



UNIVERSITÄTS-
BIBLIOTHEK
PADERBORN

Universitätsbibliothek Paderborn

Urkunden-Sammlung zur Geschichte der auswärtigen Verhältnisse der Mark Brandenburg und ihrer Regenten

...

namentlich in Beziehung auf Anhalt, Bayern, Böhmen, ... und andere
Länder ; [Urkunden-Sammlung für die Geschichte der auswärtigen
Verhältnisse]

Riedel, Adolph Friedrich

Berlin, 1847

MDCCXLI. Kaiser Friedrichs Bestätigung für das
markgräflich-Brandenburgische Haus über alle dessen Besitzungen und
Rechte, vom 24. Jan. 1453.

[urn:nbn:de:hbz:466:1-54183](https://nbn-resolving.org/urn:nbn:de:hbz:466:1-54183)

MDCCXL. Des Kurfürsten Friedrich Bestätigungsbrief für den Johanniter-Orden,
am 7. Dez. 1452.

Wir friderich, von gots gnaden Marggraffe czu Brandenburg, des heiligen Romischen Reichs Ertzkamrer vnd Burggraue czu Nuremberg etc., Bekennen offentlichen mit dissem briue vor vns, vnser Erben vnd nachkomen vnd lust vor allirmeniglich, die In sehin adir horen lesen, das wir angesehen vnd erkant haben getrewe vnd fleissige dinste, die der groszwirdige vnser Rat vnd lieber getruwer, her Nickel Tirbach, Sant Johauns ordens des heiligen hufzes des hospitals czu Jherusalem In der margk, In Sachsen, wendtlandt vnd In Pomern meister vnd gemein gebietiger, vnserm lieben herrn vnd vater seligen vnserem lieben Bruder, Marggrauen Johannsen, vns vnd vnser herchafft vormals vnde biszher williglich gethan hat, teglichen thut vnde In czukunfftigen czeiten wol thun sol, kan vnd mag. Darvmb vnd och von befunder gunst vnd gnade wegen, So haben wir Im sinen orden vnd nachkomen bestetiget vnd Confirmiret alle briue, Priuilegia, friheit vnde gerechtikeit, wie er vnd sein orden die von vns vnde vnsern vorfaren, Marggraffen czu Brandenburg, vormals vnd biszher gehabt vnd gebrauchet haben: vnd wir bestetigen, Confirmiren vnd beuestigen dem gnannten herrn Nickel Tirbach sinem orden alle sulche ir Priuilegia, briue, freyheit vnd gerechtikeit mit allen Iren Innenhaldungen, stucken, Punckten vnd Artickeln vnd allen Iren besitzungen, alden herkomen vnd gewonheiten, So sie die vormals vnd biszher von vns vnd vnsern vorfaren, Marggraffen, gehabt vnd gebrauchet haben, Sy darby czu hanthaben, czu behalten vnd Ewiglichen bliben czu lassen, In Crafft vnde macht diszes briues. Czu Vrkunde mit vnserem anhangenden Insigel versigelt vnd gebin czu franckenfurt, am donerstag nach sant Niclas tag, Anno domini Millefimo Quadringentesimo Quinquagesimo secundo.

Nach dem Kurfürst. Lehn- u. Copialbuche Nr. XI, fol. 6.

MDCCXLI. Kaiser Friedrichs Bestätigung für das markgräfllich-Brandenburgische Haus über alle
dessen Besitzungen und Rechte, vom 24. Jan. 1453.

Wir fridrich, von gots gnaden Romischer keyser, zu allen zeiten merer des Reichs, herzog zu Osterreich, zu Steir, zu kernten vnd zu Crain, Graue zu Tirol etc., Bekennen vnd Thun kunt offenbar mit dissem briue Allen den, die jn sehen oder horen lesen. Wiewol wir von Romischer keyserlicher Werdikeit, dar jn vns dann der almechtige got durch seine gotliche gutikeit gesetzt hat, allezeit geneigt sind, allen vnsern vnd des Reichs vndertanen vnser gnade vnd furderung zu beweisen, So sein wir jn sunderheit mer emsig den vnsern gunst vnd guttat gnediglich mitzutailen, die vnser vnd des Reichs furderste glider sein vnd vns die burden das heilige Reich zuerwesen mit tragen hilffen vnd sich darin getrewlich vnd stetiglich beweisen vnd vnerdrossen finden lassen. Wann nu fur vns komen ist der hochgeborne vnser liber Oheim vnd furste Albrecht, Marggrau zu Brandenburg vnd Burggraue zu Nuremberg vnd vns von seinen vnd der Hochgebornen

Vnser liben Oheimen vnd kurfursten vnd fursten fridrichs etc., Johanfen vnd fridrichs, feiner Bruder wegen fleiffiglich gebeten hat, das wir jne vnd iren erben, Marggrauen zu Brandenburg vnd Burggrauen zu Nuremberg, semplichen alle Recht vnd Wirdikeit, freiheit, gnade, gewonheyt, lantgericht vnd herkomen, die zu jn vnd iren fursten Thume, herschafften vnd herlichkeiten gehoren, vnd alle handvesten vnd briue, die sie vbir ir gerechtikeit, wirdikeit, freiheit, gnade, gewonheit, lantgericht vnd herkomen vnd vbir alle pfantschaft vnd ampt, die sie von Romischen keyseren vnd konigen, vns vnd den heiligen Reich, haben und auch ober alle ander sachen, als ir Vater, Altuordern vnd sie die von seliger gedechtnus Romischen keysern vnd konigen, vnfern vorfarn vnd dem Reich semplichen vnd sunderlichen erworben vnd herbracht haben, zu bestetigen, zu beueftigen, zu vernewenn vnd zu Confirmiren geruchten, Von sunderlichen vnfern keyserlichen gnaden. Des haben wir angefehenn sein Redlich vnd vernunftige bete vnd merckliche getrewe dinst vnd Ere, die er vnd die vorgnanten sein bruder vns vnd dem heiligen Reiche oft vnd vnuordrossenlich erboben haben vnd stetiglich mit gauzen trewen erzeigen vnd darumb mit sunderlichen Rate vnser vnd des Reichs fursten, Grauen, heren, Edeln vnd getrewen mit wolbedachtem mute, rechter wissen vnd Romischer keyserlicher macht vollkommenheyt Bestetigen, befestigen, vorneuen vnd Confirmiren, wir jne semplich vnd iren erben Marggrauen zu brandburg vnd Burggrauen zu Nuremberg, Alle ire gerechtikeit, Wirdikeit, freyheit, gnade, gewonheyt, Priuilegia, mit allen iren puncten, lantgerichten zu Nuremberg vnd andern herkomen, die zu jn vnd iren kurfurstenthum, furstenthum vnd herschessiten gehoren, vnd alle hantvesten, Schrifte, briue vnd freyheit, domit ir altuordern Vnde sie von Romischen keysern vnd konigen, vnfern vorfarn, vns vnd dem heiligen Reich begnadet vnd gefreyet seyn, vnd die samptlich vnd sunderlich herbracht haben vber alle irer kurfurstenthum, furstenthum, gerechtikeit, freiheyt, gnad, gewonheit, lantgericht, besizungen, eygenschaft, vellen, Stete, land, lewte, Closter vnd Clostervoigtzeyen, Mannen, Manschesten, lehen, lehensschessiten, geistlich vnd Wertlich, Zwingen vnd bannen, Creyssen, welden, holczern, Puschennvelden, weiden, wassern, wasserlewften, Vischereyen, geiagden, Wiltpannen, gerichtten, geleiten, Muntzen, erzberckwerken, nuzen, Zinsen, gulten vnd allen Pfantschaften vnd ampten, die ir Vater vnd sie von dem Reich haben, vnd ober alle ander dinge, wy man die genennen mag mit sunderlichen Worten, vnd bestetigen vnd Confirmiren jn auch zu gesampter hant vnd lust in craft disss briefs alle ire Herschaft, nutze vnd zugehorungen, gerechtikeit, freiheit, zolle, alle groschen, all Turnas vnd knappengelt zu Selse vnd anderlwo, die ir vater vnd altvordern seligen vnd sie bis .xv. datum diefs briefs besessen, gebraucht, genossen vnd jngehat haben, Vnd vernewen vnd Confirmiren In das alles, das hievor geschriben steet vnd alle die hantvesten, Schrifte vnd brief, die sie vnd ir altuordern daruber haben vnd die irem Vater vnd altvordern vnser vorfar, keyser Sigemund, gegeben hat vnd auch mit namen die teylungen vnd einigungen, die jr vater seliger bey seinem leben oder sie sich selber mit iren landen, lewten, Zwengen vnd gebiten vorschriben von vnd zu einander gefatzt, sich vereynigt vnd geteilt haben, Alles nach lawte der briue, die sy doruber vndereinander gegeben haben vnd auch fulche teylung, die sy noch tun werden, oder etliche lehnguter, Slos, Stete,

land, einer dem andern Ingeben, vbergeben ader huldigen werden lassen, in allen jren Puncten, meynungen, artikeln, von worte zu worte, als sie begriffen vnd geschriben sindt vnd funder vnder in begriffen vnd geschriben werden mogen, gleicher weise als sie in dissem briue genczlich begriffen weren oder ab sie durch Recht ader gewonheyt hierjune begriffen sein solten vnd Seczen, meynen, orden vnd wollen das die vorgebant vnser Oheyman vnd irer erben dabey bleiben, der geniffen vnd gebrauchen fullen von menniglich vorgehindert. Wir Widderruffen vnd vornichtigen auch damit aufs vnserm lunderlichen wissen vnd von keyserlicher macht wegen mit dissem briue alle freiheit vnd gnaden, die vnser vorfar selige oder wir gegeben hetten oder geben haben, die wider der gnanten vnser kurfursten vnd fursten freiheit, gerechtikeit, lantgerichte, herkomen, kouffe ader gebrauch in der Marck zu brandburg in burggrauehum zu Nurenberg vnd in andern jren herschaften gebiten vnd zugehörungen sein mochten oder schedlich sein mogen, vngeuerlich, Wollen vnd Schaffen auch das dieselben in allen iren Puncten, artikeln vnd inhalten genczlich vnd gar vernichtet, Craftlos vnd machtlos sein sollen, vnd gebietenn darumb Allen vnd iglichen fursten, geistlichen vnd Werltlichen, Grauen, freien heren, Rittern, knechten, Amptleuten, Voiten, lantrichtern, Richtern, burgermeistern, Reten vnd gemeinden vnd lust allen andern vnserm vnd des Reichs vndertanen vnd getrewen ernstlich vnd vestiglich mit dissem briue, das sie die vorgebant vnser Oheim vnd ir erben, Marggraue zu brandburg vnd burggraue zu Nurnburg, an solchen jren gnaden, freiheiten, Rechten, briuen, Priuilegien, gerichtten, Hofgerichtten, lantgerichtten vnde andern obgeschriben dingen nicht hindern noch jren in keinweyse, Sunder sie dabey gerulich bleiben lassen, als lib in sey, vnser vnd des Reichs swere vngnade zuuormeyden. Des sind gezewgen die Erwirdigen Hochgeborn Edeln vnser vnd des Reichs liben getrewen Enea, Bischof zu der hoen synne, Ludwig, Pfalzgraue bey Rein vnd herzog in beirn, Albrecht, Herzog zu Osterreich etc., Wilhelm, Herzog zu Sachsen, lantgraue in doringen vnd Marggraf zu Meiffen, Otte, Pfalzgraue bey Rein vnd herzog in beirn, karl, Marggraue zu baden, vnser libe Oheim vnd Swager vnd fursten, Wilhelm vnd fridrich, geuettern, zu Hennenberg, Heinrich von Swarczburg, Vlrich von Ottingen, Albick von Sulcz, Heinrich von Lupfen, grauen, Albrecht zu hoenloe, Trutpertz zu Stauffen, heren, Heinrich vnd Cort zu Bappenheim, des heiligen Romischen Reichs Erbmarschall, Hans Vngnad, Walter von Sebung, vnser Rete, Hans von fraunberg, Jorg Alheyner, Olwalt Torrunger, Wolfganck Pinzenawer, Turing von halwile, hans von Wolfstein vnd Suft vil ander edeln vnser vnd des Reichs liben getrewen. Mit Orkunt disses briefs versigelt mit Vnser keyserliches Maiestat Ingesigil. Geben zur Newenstat, An der Mittwochten vor sand pauly tag Conuersionis, Nach cristi geburt Virzehnhundert vnd in dem dreyvndfunffzigsten, vnser Reichs in dem dreyzehenden vnd des keyserthumbs in dem ersten Jaren.

Ad mandatum domini Imperatoris Vrlicus Welczli.